

**REGIONAL NEWS BULLETIN  
HEADLINES (EVENING)**

**Date – 24/12/2024**

**Time - 18:30 Hrs**

1. Larsap Dr Hari Babu Kambhampati leh CM Pu Lalduhoma te'n Mizoram mipui Krismas leh Kum Thar chibai an buk.
2. Council of ministers thukhawm chuan Mizoram State University Bill, 2024 chu a pawm.
3. Council of ministers thukhawm chuan Mizorama Gorkha awmte OBC dinhmun pek chungchang chu zir chian phawt turin a dah.
4. Vawiin khan Prime Minister Narendra Modi-a hovin New Delhi-ah budget ruahman (pre-budget) chungchangah inrawnkhawm a ni.



**GOVERNOR CHRISTMAS MESSAGE**

Mizoram larsap Dr Hari Babu Kambhampati chuan Krismas leh Kumthar lo thleng tur pualin Mizoram mipuite duhsakna a hlan.

Krismas vuakveta khawtlang mipui tha taka an inphuarkhawm thin leh mahni tawng ngei maia Krismas hla an sa thin chuan hnam ziarang a tarlang tel a ni a ti a. Krismas hun chhunga induhsakna lantir na'na thilpek an inhlan thinte chuan Mizo mipuite thilphalna a pholang a, mi baihvai leh dawmkan ngai zawkte puala an luangchhuak thin chu entawntlak a nih zia thu a sawi a. Inlungruak taka Mizoramin Krismas a lawm tlang leh thei tur chu lawmawm a tih thu a sawi. Aizawl khawpui chu India ram khawpui zinga boruak thianghlim berah puan a nih thu a sawi a. Boruak thianghlim neih theihna tura hmalakna hi tun hunpui lo thleng turah pawh vawngnung tlat turin leh, boruak tibawhlawh lo zawnga Krismas leh Kumthar lawm za turin Mizoram mipuite a ngen thu leh mipuite chu dan leh thupek tha taka zawm chunga hunpui hmang turin a duh thu a sawi a.

Larsap chuan tun Krismas pawh Mahni chhungte kianga hunpui hmang ve thei lo tur midang tana rawngbawlna hna thawk mek - sipai, hriselna lama thawktute leh adangte mi engemawzat an awm thu leh chung mite chuan mahni aiin midang an dah pawimawh hmasa a, Krismas awmzia leh nihna chiang takin an tarlang a, an ngaihsanawm takzet a ni a ti.

Prime Minister kaihhraina hnuaiah India chuan kum 2047 ah ram changkang leh intodelh 'Vikshit Bharat' nih tumin tan a la mek a ni a ti a. Hemi dinhmun thleng tur hian Mizoram pawhin mawhphurhna pawimawh tak a neih thu leh India ram hmasawna tur ruangam duanah Mizoram a tel ve a tul a. Hemi atan hian India Sawrkar policy leh programme-te ngaihven thin tur leh a hlawhtlin theih nana phur taka tawiawm turin a sawm a ni.



**CM MESSAGE**

Chief Minister Pu Lalduhoma chuan Mizoram chhung leh ram pawna cheng zawng zawngte Krismas leh Kumthar lo thleng tur chibai a buk.

Kumin Krismas lo thleng tura hmangaih chan ta te lungngai leh khawhar taka hun hmangte tan an awm thu leh an tan Pathian thlamuanna leh awmpuina a dil thu a sawi a. Natna avanga ramchhung leh pawna awm te, mahni inchhung pawh chhuahsan hleithei lo a awm te pawh a rilruah an awm reng a. Mizoram chhehvela cheng Zofate chenna hmuna harsatna thleng mek avangin unau tamtak ten in leh lo an chan a, himna zawngin Mizoram leh hmun hrang hrang an pan a ni a ti a. Raltlante pawh Mizo mipuite'n an hriat reng thu leh an tana an tawngtai nasat thu a sawi a. Zirna leh eizawna avanga rampawna awm zawng zawng te, Mission field a thawk zawng zawngte pawh Mizo mipuiten an hre rengin Hlim leh lawm taka Krismas leh Kumthar hmang turin duhsakna a hlan thu a sawi.

CM Pu Lalduhoma chuan Krismas chu Pathian thilthlawn pek khawvelin a dawn ni a nih avangin a hniakhnung zuia he hun puala mimal harsate tana luangchhuak,

mimal leh tlawnngai pawl tam tak an awm a hriat thu a sawi a. An thil tih chuan rilru a tihlim thu leh Isua Krista hnungzuitute nihlawhzia a hmuhtirin Zofate kan inhmangaihzia pawh a tilang a ni, a ti a.

CM chuan Krismas chu Inremna Ni a nih thu leh nupa inremna ni, unau inremna ni, thenawm khawveng inremna ni, ram leh hnam inremna ni atana hmang ve turin Mizo mipuite a sawm a. Krismas zawh huna Kumthar chuankai hunah pawh Mizo mipuite tan kum tha a nih ngei theihna turin duhsakna a hlan thu a sawi a. Pathian kaihhraina leh mipuite zarah ZPM sorkar pawhin kum khat a lo tling ve tawh thu a sawi a. Mipuite'n sorkar an thawhpuinaah lawmthu a sawi bawk a ni.

<><><>

#### STATE UNIVERSITY

December ni 20-a council of ministers thukhawm chuan Mizoram State University din a nih theihna atana duan Mizoram State University Bill, 2024 chu a pawm.

Hemi rual hian Mizoram a state university din tur chu council of ministers thukhawm hian a pawm a. National Education Policy 2020 chuan state university la nei lo zawng zawng state-te chu din vek turin a ti a, chutiang chuan kalpui a ni. Mizoramah hian university pahnih – Mizoram University leh ICFAI university a awm a, Mizoram University hi central university a ni a, ICFAI hi private university a ni bawk si a, state university a la awm loh avangin din a ngai ta a. He tia state university dinna tur pawm a nih takah hian assembly inkhawm lo awm leh turah Mizoram State University Bill, 2024 hi pawm tura chhawpchuah a nih rin a ni.

Ni 20 December a Chief Minister Pu Lalduhoma kaihhruaia Council of Ministers thukhawm chu zan thlenga an thutkhawm avang leh a tuk Inrinni-ah Chief Minister hi Agartala, Tripura a NEC plenary session vawi 72-na a a kal bawk si avangin sorkar thuchhuah tura phalna an hmuh hman loh avangin tlai khaw hnu-a tihchhuah a nih tak thu sorkar thuchhuah chuan a sawi.

<><><>

#### CHRISTMAS PREPARATION/NO VEHICLE ZONE

Krismas lo thleng tura inbuatsaihna chuan a vawrtawp a thleng chho mek a, vawiin, Urlawk Ni hian mi tam tak Aizawl bazarah an pungkhawm leh a ni.

Krismas leh Kum thar vuakveta Aizawl khawpui chhunga mipui bazar, ke a kalte him zawk na'na lirthei tlan lohna hmun No Vehicle Zone ruahman chu vawiin hi a ni nihna a ni a. Nimin, a bul tan ni aiin mipuite an thahnem fe zawk a ni.

Coordination Committee on Traffic Management in a ruahman angin Krismas hma bikah chuan nimin leh vawiinah No Vehicle Zone hi Chanmari leh Zodin Square inkarah zing dar 10:00 atanga tlai dar 4:00 chhungin kalpui a ni a. Kumhlui thlah ni, December ni 31-ah kalpui a ni dawn bawk a ni.

No Vehicle Zone hian Emergency duty bakah, natna avanga Damdawiin pante a huam lo a. Coordination Committee on Traffic Management te chuan lirtheia chuang te chhuk na tur bakah lirthei chi hrang hrang hunna tur ruahmanna an siam bawk a ni.

<><><>

#### AIZAWL BAZAR

Commerce & Industries dept hnuiaia Aizawl New Market Bazarpui Marketing Inspector Pu Vanlalsawma chuan kum dang zawng ai-in bazarah thil bo a tlem thu Akashvani Aizawl a hrilh.

Pu Vanlalsawma chuan kumin Krismas leh Kumthar vuakvetah pawisa tibo hmu let lo an awm loh thu leh kumin Krismas bikah pawisa bo hlen a la awm loh thu a sawi a. Naupang tibo leh chhungkaw inhloh te pawh an inhmuh leh mai thin thu a sawi a. December thla tuir atangin Market staff te chu tang taka an duty thin thu a sawi a. Kum danga mipui kara rukru che thin pawh report an dawn loh thu a sawi a ni.

Marketing Inspector chuan Aizawl New Market Area-ah Market staff te chu aurinna nen mipuite zingah an duty thin thu a sawi a. Tun dinhmuna Aizawl New Market ah hian hmun ven ngai bik, Sensitive Area hmun 8 a awm thu leh chung hmunte aurinna nena vil reng a nih thu sawiin misualte tan pawh chetna remchang a tam a rin loh thu a sawi a ni.

<><><>

## DRONE TRIAL RUN

Police-te chuan halpuah leh halmawi hal an awm chuan drone hmangin an enfiah dawn. Police te hian zanin hian drone hi an enchhin dawn a. Hun hmasa lamah te drone hi tangkai takin Police te chuan an lo hmang tawh a ni. Police tha tichak turin zan lamah drone hmangin venhimna thuam a ni dawn a. Police Station hrang hrang pathum ah drone dah a ni a. Aizawl khawpui surveillance leh security monitoring-ah nasa takin Police te a pui tura ngaih a ni. Aizawl mipuite'n Krismas leh Kumthar boruak tha tak hnuai an hman theih na'n Aizawl Police chuan venhimna chu uluk takin a kengkawh dawn a. Mipuite him na'n halpuah leh halmawi hâl lo turin a ngen nawn leh a ni.

Aizawl khawpui chhung hi Security zone 3-ah then niin Police Zonal officer paruk ruat an ni a, Zonal officer pui turin sector officer dah an ni bawk. Zan lamah khawlai a duty Police engemawzat dah an ni a. Police Station tinah Police duty dah belh an ni bawk.

<><><>

## AIR NEWS ON SOCIAL MEDIA

Chanchinthar hi Akashvani Aizawl atanga puang a ni a. AIR News Aizawl Youtube Channel, All India Radio News Aizawl Facebook page leh newsonair.gov.in-ah te, chanchinthar hi ngaihthlak leh chhiar theih a dah a ni. Naktuk zing dar 7 leh a chanve-ah Chanchinthar puan leh a ni ang.

<><><>

## GORKHA OBC

Tun hnai a council of ministers thukhawm chuan Mizorama Gorkha awmte Other Backward Class (OBC) dinhmun pek chungchang a ngaihtuah a, zir chian phawt turin a dah.

Sorkar thuchhuahin a tarlan danin Mandal Commission chuan Gorkha te OBC status an nih ve theihna dan a duang a. Khawtlang nun, zirna leh sum leh pai dinhmun hmanga teh tur an ni a. Mizorama Gorkha te hi heng tehate hmanga tehin midangte aia an hniam bikna a awm lo va, Mandal Commission tehna atang chuan OBC status pek theih an ni lo, tiin minister thukhawm chuan ngaihdan an siam a. Chuti chung chuan Mizoram sawrkar chuan Gorkha te hi Central sawrkar reservation hnuai a OBC pek chu a duhsak tih an sawi a. Chu chu lo nei ta se, Mizoram sawrkar hnuai a reservation neih phah na'n an hman dawn leh dawn loh zirchian phawt ni se, ti a thutlukna siam a ni ta a ni.

Mizorama kum 1950 leh a hma lama lo cheng tawh Gorkha-te leh an thlahte'n OBC dinhmun a awm ve an ngiatna chungchang zir chian tura Mizoram sorkarin a din Permanent Body chuan OBC ni ve tur hian rawtna a lo thehluh tawh a. Chuti chung chuan tlawmngai pawl thenkhatte nawr vang ni ngei a ngaih theihin sorkar chuan a la pawmsak ta lova. Hemi chungchangah hian Gauhati High Court chuan Supreme Court thupek zulzui-in nikum February khan Mizoram sorkar chu Gorkha-te OBC pek an remti lo a nih pawhin a remtih loh chhan chian taka puang turin a phut a ni.

Kum 2021 a Gorkha chhiarpui sorkarin a buatsaihah chuan Mizoramah hian January ni 26, 1950 leh a hma lam atanga lo awm tawhte leh an thlahte chu mi 7,686 an awm tih tarlan a ni a. Mizorama cheng dangte scheduled tribe chanvo chang an nih lai-in leilung fate anga chanvo tha an la chang ve ta lo a ni.

<><><>

## LYNCHING

Airfield khua ami David Lalmuanpuia (31) an khawtlang VDP/Kumpulan te'n kut an thlak avanga a thi ni a thubuai kal mekah Airfield khaw mi 5 man belh leh an ni.

Police hotute hnen atanga thu dawn danin nimin khan David Lalropuia (27), Lalramhluna (56), Lalkhawngaiha (28), Lamneihpauva (40) leh Lalhmingliana (40) te chu Police te'n an man a. Bawngkawn Police Station-a December ni 19-a Bharatiya Nyaya Sanhita (BNS) section 105, sub section 3(5) hmanga thubuai ziah luh tlawhchhana man an ni a. He'ng an mi man 5-te hi vawiin khan Aizawl district court-ah hruai an ni a, court thutlukna angin Central Jail-ah d ahluh nghal an ni. Heti hian nghaisak rawn a nih avanga nunna chan ta David Lalmuanpuia thih chungchangah Airfield khua ami mi 8 man an ni ta a. Pathianni khan Airfield khua ami vek an VDP

hruaitu K.T Zonunsanga (31) leh R. Lalhmangaihzuala (56) te chu Police-in man tawhin jail-ah thawn an ni tawh a ni.

Police hnena David Lalmuanpuia nu Pi Nunthangmawii FIR thehluh dan chuan a fapa hi December ni 18 zan khan Pastor chenna in rawk a nih chungchangah ringhlelin VDP/Kumpulan hruaitute'n VDP pisa-ah an hruai a. An dawpna lamah hliam na tak tuarin a theih tawka dan a tum pawhin a hlawhchham a, Damdawiin-a an hruai hnu-ah zing dar 1 hnu-ah Greenwood Damdawi-ina thi a puan a ni ta a ni. He thil thleng hian social media a luah nasa hle.

<><><>

**PM MODI HOLDS PRE-BUDGET CONSULTATION WITH ECONOMISTS IN NEW DELHI**

Vawiin khan Prime Minister Narendra Modi-a hovin New Delhi-a NITI Aayog-ah economist mi challangte nen budget ruahman (pre-budget) chungchangah an inrawnkhawm. He hunah hian Union Finance Minister Nirmala Sitharaman te, NITI Aayog CEO BVR Subhramanyam leh mi pawimawh dangte an tel bawk a ni.

Kum 2025-26 atana Sawrkar laipui Budget tur chungchanga inrawnkhawm hi tun thla ni 6 atang khan tan a ni a. Union Finance Minister Nirmala Sitharaman-i pawhin hemi chungchang hi state hrang hrang Finance Minister te, loneitu pawl te, economist leh MSME lamte pawh a lo sawipui tawh bawk a ni.

Kum 2025-26 atana Sawrkar laipui budget chu Lok Sabha thutkhawm leh hmasa ber, kum thar February ni 1-ah Union Finance Minister chuan a pharh dawn a ni.

<><><>